



# KENYATAAN MEDIA

KEMENTERIAN PERDAGANGAN DALAM NEGERI  
DAN KOS SARA HIDUP

No. 13 Persiaran Perdana, Presint 2,  
62623 Putrajaya

No. Telefon : 03-8882 5562

No. Fax : 03-8882 5569

## OPS TIRIS - PREMIS DISYAKI DIJADIKAN TEMPAT TRANSIT MINYAK DIESEL BERSUBSIDI DISERBU PENGUAT KUASA KPDN

**PUTRAJAYA, 8 DISEMBER 2023** – Kementerian Perdagangan Dalam Negeri dan Kos Sara Hidup (KPDN) berjaya menumpaskan aktiviti penyelewengan minyak diesel bersubsidi menerusi **OPS TIRIS** dalam satu serbuan yang dilakukan ke atas sebuah premis tanpa nama di Klang, Selangor yang disyaki dijadikan stor haram tempat penyimpanan dan pemindahan minyak diesel bersubsidi pada **6 Disember 2023**.

2. Serbuan yang dilakukan oleh sepasukan anggota penguat kuasa daripada KPDN Selangor bermula kira-kira jam 2.30 pagi itu adalah hasil risikan yang telah dilakukan oleh pihak KPDN selama dua minggu sebelum serbuan.

3. Hasil maklumat awal yang diperolehi, modus operandi sindiket ini adalah menggunakan sebuah lori *bonded* yang telah diubahsuai dengan tangki tambahan jenis *Intermediate Bulk Containers* (IBC) bagi membeli minyak diesel bersubsidi di stesen-stesen minyak sekitar Lembah Klang. Minyak diesel itu kemudiannya akan dibawa ke stor haram terbabit untuk dipindahkan ke sebuah lori tangki yang lain sebelum dijual di pasaran.

4. Hasil pemeriksaan lanjut ke atas keseluruhan premis, pasukan serbuan telah menemukan minyak diesel dengan kuantiti keseluruhan berjumlah **12,100 liter** serta beberapa peralatan lain yang digunakan untuk kegiatan penyelewengan minyak diesel.

5. Dua buah lori, pam bermotor, paip penyambung, minyak diesel, beberapa dokumen berkaitan serta peralatan-peralatan lain yang ditemui di lokasi serbuan telah disita bagi tujuan siasatan lanjut. Nilai keseluruhan rampasan dianggarkan berjumlah **RM218,015.00**.

6. Empat orang lelaki, dua daripadanya warga asing yang mengaku sebagai pekerja di premis terbabit serta pemilik lori berkenaan, berumur lingkungan di antara 25 hingga 30 tahun telah ditahan bagi membantu siasatan.
7. Kertas siasatan telah dibuka dan siasatan lanjut ke atas kes ini sedang dilakukan di bawah **Akta Kawalan Bekalan (AKB) 1961** bagi mengenalpasti individu/syarikat yang terlibat dalam aktiviti ini serta rantai pengedaran minyak diesel tersebut termasuklah sumber minyak diesel ini diperolehi dan diedarkan.
8. Berdasarkan statistik penguatkuasaan **OPS TIRIS** bermula **1 Mac 2023 sehingga 6 Disember 2023**, sebanyak **14,529 pemeriksaan** telah dilakukan di seluruh Negara. Daripada jumlah itu, sebanyak **767 kes** telah dihasilkan yang melibatkan nilai rampasan keseluruhan berjumlah **RM88.88 juta**.
9. Sebanyak **638 tangkapan** juga telah dilakukan dalam tempoh yang sama melibatkan **531 individu merupakan warganegara, 105 individu merupakan warga asing** manakala **dua individu adalah pemastautin tetap**.
10. **KPDN** ingin memberi amaran keras ke atas mana-mana individu/syarikat yang berkaitan agar sentiasa mematuhi perundangan yang telah ditetapkan. Mana-mana orang yang melakukan kesalahan boleh diambil tindakan di bawah **Akta Kawalan Bekalan 1961 [Akta 122]** dan **jika disabitkan boleh didenda tidak lebih RM1,000,000.00 (Ringgit Malaysia Satu Juta)** manakala bagi kesalahan berikutnya tidak melebihi **RM3,000,000.00 (Ringgit Malaysia Tiga Juta)** bagi orang perseorangan atau penjara tidak melebihi tiga tahun atau kedua-duanya sekali manakala bagi syarikat sekiranya sabit kesalahan boleh didenda tidak melebihi **RM2,000,000.00 (Ringgit Malaysia Dua Juta)** manakala bagi kesalahan berikutnya tidak melebihi **RM5,000,000.00 (Ringgit Malaysia Lima Juta)**.
11. Selain itu, syarikat ini juga akan disiasat di bawah **Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram 2001 (AMLATFPUAA 2001) [Akta 613]** iaitu kesalahan pengubahan wang haram bagi tujuan mengesan, membeku, menyita serta sehingga ke peringkat perlucutan hak ke atas apa-apa hasil pendapatan atau harta yang dijana daripada aktiviti haram penyelewengan berkaitan minyak diesel.
12. Jika disabitkan dengan kesalahan di bawah **Akta 613** ini boleh dipenjarakan selama tempoh tidak melebihi lima belas tahun dan juga boleh didenda tidak kurang daripada lima kali ganda jumlah atau nilai hasil daripada aktiviti haram atau peralatan kesalahan itu pada masa kesalahan itu dilakukan atau lima juta ringgit yang mana yang lebih tinggi.

13. Kementerian juga akan sentiasa menggerakkan anggota penguat kuasanya dan memperhebatkan tindakan penguatkuasaan serta pemantauan bagi memastikan aktiviti haram ini dapat dibendung daripada terus berleluasa.

14. Masyarakat disaran untuk menjadi mata dan telinga kepada pihak berkuasa dengan memberikan kerjasama sekiranya mempunyai sebarang maklumat terutamanya berhubung aktiviti penyelewengan barang kawalan dan bersubsidi bagi memastikan aktiviti haram ini dapat dibanteras sehingga ke akar umbi yang boleh menyebabkan kerugian besar kepada rakyat dan Negara.

15. Orang ramai yang mempunyai sebarang maklumat berhubung aktiviti penyelewengan barang kawalan dan bersubsidi boleh menyalurkan aduan yang lengkap kepada pihak Kementerian melalui saluran berikut:

- i. WhatsApp 019-279 4317;
- ii. Portal e-Aduan KPDM iaitu <http://eaduan.kpdn.gov.my>;
- iii. Call Centre 1-800-886-800;
- iv. E-mel [e-aduan@kpdn.gov.my](mailto:e-aduan@kpdn.gov.my);
- v. Aplikasi Telefon Pintar Ez ADU KPDM;
- vi. Bilik Gerakan Penguatkuasaan 03-8882 6088 / 6245, dan;
- vii. **Kod QR Aduan Bekalan:**



**YBHG. DATUK AZMAN BIN ADAM,  
KETUA PENGARAH PENGUAT KUASA,  
KEMENTERIAN PERDAGANGAN DALAM NEGERI  
DAN KOS SARA HIDUP,  
PUTRAJAYA, 8 DISEMBER 2023.**

**###**

## LATAR BELAKANG

Kementerian Perdagangan Dalam Negeri dan Kos Sara Hidup (KPDN) telah ditubuhkan pada 27 Oktober 1990. Matlamat penubuhan Kementerian adalah untuk menggalakkan pembangunan perdagangan dalam Negeri yang berdaya maju, berdaya saing, dan berdaya mampan, khususnya di dalam sektor perdagangan pengedaran.

Sektor perdagangan pengedaran adalah antara penyumbang utama KDNK negara dan ia bertindak sebagai benteng kestabilan ekonomi, terutama semasa situasi ekonomi luaran berada di dalam keadaan ketidakpastian. Perdagangan pengedaran perlu kukuh bagi menampar sebarang ketidakstabilan dalam ekonomi negara.

Dalam masa yang sama, Kementerian juga komited dalam melindungi kepentingan dan hak-hak pengguna. Ini termasuk membangunkan ekosistem pengguna dan peniaga yang bersifat melengkap dan ke arah *self-regulated*, seiring dengan aspirasi ke arah masyarakat negara maju. Ia diharapkan akan melahirkan pengguna dan peniaga yang matang dan beretika dalam mengurusniaga, dan hasilnya adalah negara yang seimbang dari segi ekonomi dan sosial.

Agensi di bawah KPDN:

